

queat: is sine scrupulo baptizandus est. Nam concilio Carthaginensi 5. cap. 3. rectè, Placuit de infantibus, quoties non inveniuntur certissimi testes, qui eos baptizatos esse sine dubitatione testentur, neque ipsi sunt per ætatem idonei de traditis sibi sacramentis respondere, absque ullo scrupulo esse baptizandos, ne ista trepidatio eos faciat sacramentorum purgatione privari. Nam, ut Leo rectè addit, iteratum dici non potest, quod nescitur esse factum.

## CAPUT DECIMUM QUARTUM,

## De cœna Domini.

**C**OENA DOMINI est sacramentum N. T. ab ipso Christo immediatè in usum Ecclesie ad finem usque mundi institutum, in quo legitima panis & vini externa administratione, sumptione, manducatione & haustione mors Domini annunciatur, internè corporis & sanguinis Christi sumptio & fruitio exhibetur, & arctissima illa unio sive κοινωνία, quâ sumus cum Christo capite nostro conjuncti, obsignatur & confirmatur, fideles verò suam erga Deum gratitudinem & obligationem, communionem inter ipsos & ab aliis  
omni-